

**Bil. 25**

**Khamis**

**11 Julai 2019**



**MALAYSIA**

# **PENYATA RASMI PARLIMEN**

*Parliamentary Debates*

## **KAMAR KHAS**

*Special Chamber*

**PARLIMEN KEEMPAT BELAS  
PENGAL KEDUA  
MESYUARAT KEDUA**

## KANDUNGAN

### UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Masalah Banjir Kilat (*Flash Flood*) di Kawasan Kota Kinabalu**  
- YB. Tuan Chan Foong Hin (*Kota Kinabalu*) [Halaman 1]
- **Isu Pembatalan Pertubuhan Pengurusan Wat Nikhodharam,  
Alor Setar serta Kes-kes Berkenaan**  
- YB. Tuan Chan Ming Kai (*Alor Setar*) [Halaman 4]

**MALAYSIA  
KAMAR KHAS  
PARLIMEN KEEMPAT BELAS  
PENGKAL KEDUA  
MESYUARAT PERTAMA  
Khamis, 11 Julai 2019**

**Mesyuarat dimulakan pada pukul 2.30 petang**

**DOA**

*[Timbalan Yang di-Pertua (Dato' Mohd Rashid Hasnon)  
mempengerusikan Mesyuarat]*

---

**UCAPAN DI BAWAH USUL  
BERKENAAN PERKARA TADBIR KERAJAAN (P.M. 17)**

**Masalah Banjir Kilat (*Flash Flood*) di Kawasan Kota Kinabalu**

**2.34 ptg.**

**Tuan Chan Foong Hin [Kota Kinabalu]:** Terima kasih saya ucapkan kepada Tuan Yang di-Pertua atas peluang yang diberikan untuk berucap dalam sesi Kamar Khas ini. Tuan Yang di-Pertua, di sini saya ingin membangkitkan isu banjir kilat di kawasan-kawasan di dalam kawasan bandar Kota Kinabalu dan kawasan sekitarnya. Banjir kilat ini akan berlaku selepas hujan yang lebat dan dalam masa satu bulan telah berlaku beberapa kali, iaitu pada 16 Mei, 31 Mei dan 4 Jun.

Kawasan-kawasan yang paling terjejas adalah kawasan perumahan Kepayan *Ridge*, kawasan *parking* di Hospital Queen Elizabeth 1, sepanjang jalan dari Stesen Keretapi di Tanjung Aru sehingga ke Hotel Airport View, kawasan perumahan Lido, Maktab Sabah, di sepanjang jalan dari Sekolah Tinggi Kota Kinabalu dan lain-lain kawasan yang banjir sehingga tidak dapat dilalui kenderaan. Antara mangsa banjir kilat ini termasuk Menteri Belia dan Sukan Sabah, Yang Berhormat Tuan Phoong Jin Zhe, ADUN Luyang, yang tinggal bersama-sama ibunya di kawasan Lido yang dilanda banjir sehingga paras lutut.

Walaupun tiada kemalangan jiwa ataupun kecederaan serius yang dilaporkan ketika banjir kilat kali ini, tetapi penduduk di kawasan-kawasan tersebut mengalami kerugian yang besar akibat kerosakan kepada harta benda di rumah seperti sofa, televisyen, komputer, telefon bimbit dan lain-lain perkakas-perkakas elektrik dan elektronik. Puluhan buah kenderaan juga ditenggelami dalam

air. Bukan itu sahaja, kos untuk mencuci dan membersihkan kawasan daripada lumpuh banjir adalah tinggi.

Saya mendapati bahawa antara sebab-sebab banjir berlaku adalah disebabkan kegagalan sistem perparitan untuk menyalirkan air hujan dengan berkesan sehingga berlakunya takungan air hujan di sesebuah kawasan. Banjir ini adalah banjir kilat jenis *nuisance flood* yang akan berlaku setiap kali hujan turun dengan lebat walau hanya untuk beberapa jam. Selepas beberapa jam, keadaan banjir adalah beransur pulih.

Yang Berhormat Datuk Junz Wong, ADUN Tanjung Aru, yang juga Menteri Sabah yang bertanggungjawab bagi Jabatan Pengairan dan Saliran negeri Sabah, telah pun dilaporkan dalam surat khabar mendakwa bahawa Kerajaan Persekutuan lewat ataupun gagal menyalurkan walau satu sen pun bagi projek-projek yang dipohon sehingga banjir berlaku. Namun demikian, saya difahamkan bahawa terdapatnya projek-projek pembinaan parit, termasuk Kota Kinabalu Master Plan, Putatan Drainage Master Plan dan lain-lain projek perparitan di kawasan Kota Kinabalu yang telah pun diluluskan.

Oleh yang demikian, saya ingin meminta penjelasan berkenaan projek-projek perparitan yang dipohon oleh Kerajaan Negeri Sabah. Sila nyatakan kesemua projek-projek perparitan yang dipohon oleh Kerajaan Negeri Sabah, mana-mana yang diluluskan, mana-mana yang tidak diluluskan dan alasan mengapakah ianya tidak diluluskan. Juga jelaskan jumlah kos bagi projek-projek yang diluluskan. Sekian, terima kasih.

**2.37 ptg.**

**Timbalan Menteri Perumahan dan Kerajaan Tempatan [Dato' Raja Kamarul Bahrin Shah bin Raja Ahmad Baharuddin Shah]:** Terima kasih Tuan Yang di-Pertua, terima kasih Yang Berhormat Yang Berhormat Kota Kinabalu. *Assalamualaikum warahmatullahi wabarakatuh* dan salam sejahtera. Untuk makluman Yang Berhormat, sejak tahun 2016 hingga 2019, Kementerian Perumahan dan Kerajaan Tempatan (KPKT) telah membelanjakan sebanyak RM8.13 juta bagi membiayai 38 projek untuk kerja-kerja membina dan menaik taraf longkang serta parit di Kota Kinabalu, Putatan dan Penampang.

Projek-projek tersebut merupakan projek kecil berimpak tinggi (BP.1) yang telah dimohon oleh pihak berkuasa tempatan (PBT) bagi menyelesaikan isu-isu mendesak melalui aduan masyarakat setempat. Untuk makluman Yang Berhormat juga, di bawah BP.1, Sabah menerima 43.3 juta iaitu yang tertinggi di Malaysia untuk tahun 2019. Ringkasan projek adalah seperti berikut:

**RINGKASAN PROJEK BINA BARU DAN NAIK TARAF LONGKANG/PARIT DI KAWASAN  
KOTA KINABALU, PUTATAN DAN PENAMPANG  
DARI TAHUN 2016 sehingga 2019**

BIL.	PARLIMEN	BILANGAN PROJEK	PERUNTUKAN (RM)
Tahun 2016			
1.	Kota Kinabalu	9	1,980,000
2.	Putatan	4	280,000
3.	Penampang	0	0
JUMLAH		13	2,260,000
Tahun 2017			
1.	Kota Kinabalu	3	1,556,952
2.	Putatan	0	0
3.	Penampang	2	1,497,890
JUMLAH		5	3,054,842
Tahun 2018			
1.	Kota Kinabalu	5	1,510,000
2.	Putatan	10	465,000
3.	Penampang	5	840,000
JUMLAH		20	2,815,000
Tahun 2019			
1.	Kota Kinabalu	0	0
2.	Putatan	0	0
3.	Penampang	0	0
JUMLAH		0	0
JUMLAH KESELURUHAN		38	8,129,842

Kami difahamkan bahawasanya PBT tidak memohon untuk peruntukan *drainage*, mungkin untuk projek-projek lain tetapi di bawah *drainage* tidak ada permohonan dan ini sepatutnya dikemukakan oleh PBT yang berkenaan.

**■1440**

Untuk makluman Yang Berhormat, sehingga Jun 2019 tiada peruntukan berkaitan projek bina baru dan naik taraf parit dan longkang diluluskan pada tahun ini di kawasan Kota Kinabalu dan dikeluarkan oleh KPKT adalah berdasarkan:

- (i) senarai keutamaan projek oleh PBT, PBT yang sepatutnya memohon, ya; dan
- (ii) jumlah peruntukan bagi setiap negeri.

Sekiranya projek berkaitan parit dan longkang merupakan keutamaan, PBT boleh mengemukakan permohonan kepada KPKT dan akan dipertimbangkan tertakluk kepada skop BP.1 tadi dan baki peruntukan sedia ada.

KPKT Yang Berhormat, mengambil maklum akan kesulitan yang dihadapi oleh penduduk Kota Kinabalu berhubung isu banjir kilat yang sering berlaku ketika musim hujan dan sentiasa komited dalam memastikan kesejahteraan penduduk tempatan. Oleh itu, KPKT akan terus bekerjasama dengan PBT bagi mengenal pasti kawasan yang berisiko berlaku banjir kilat agar tindakan awal bagi mencegah masalah tersebut dapat dilaksanakan seperti pelaksanaan pembinaan atau naik taraf longkang dan parit yang patut dipohon.

Untuk makluman Yang Berhormat juga, pelan terperinci yang dimaksudkan iaitu Kota Kinabalu Master Plan dan Putatan Drainage Master Plan yang merupakan perancangan bagi mengatasi isu banjir kilat pada skala yang lebih besar di bawah bidang kuasa Jabatan Pengairan dan Saliran (JPS), di bawah Kementerian Air, Tanah dan Sumber Asli (KATS). Itulah sebagai jawapan kepada pertanyaan Yang Berhormat. Terima kasih.

**Isu Pembatalan Pertubuhan Pengurusan Wat Nikhodharam,  
Alor Setar serta Kes-kes Berkenaan**

**2.42 ptg.**

**Tuan Chan Ming Kai [Alor Setar]:** Terima kasih Tuan Yang di-Pertua. Yang Berhormat Tuan Yang di-Pertua, Yang Berhormat Timbalan Menteri Dalam Negeri, saya ingin menarik perhatian pihak kementerian ke atas satu isu yang berkenaan tentang pembatalan Pertubuhan Pengurusan Wat Nikhodharam di Alor Setar. Untuk makluman Yang Berhormat Menteri, Wat Nikhodharam didirikan pada tahun 1952 dan merupakan rumah berhala agama Buddha yang bersejarah di negeri Kedah. Pertubuhan tersebut telah didaftarkan pada tahun 2002 untuk tujuan mengurus dan mentadbir tempat ibadat wat. Namun, pertubuhan tersebut telah dibatalkan oleh Jabatan Pendaftaran Pertubuhan Negeri Kedah pada tahun 2016.

Beberapa laporan polis juga telah dibuat berkenaan dengan isu ini termasuk No. repot ALOR SETAR/013776/15 yang turut dibuka Kertas Enkuiri Polis (KEP) dan telah dirujuk kepada pihak Timbalan Pendakwa Raya. Minta Menteri menjelaskan kronologi dan justifikasi atas pembatalan pertubuhan tersebut serta justifikasi penguatkuasaan dari segi undang-undang yang berkenaan. Adakah pemindahan segala aset sebelum dan selepas pembatalan tersebut sah dari segi undang-undang dan apa perkembangan terkini atas rayuan terhadap pembatalan tersebut.

Minta Menteri menjelaskan juga apa status terkini terhadap beberapa kes siasatan atas laporan polis yang telah dibuat dan apakah punca dan sebab kes-kes tersebut ditangguhkan. Sekian, terima kasih

#### **2.43 ptg.**

**Timbalan Menteri Dalam Negeri [Datuk Mohd Azis bin Jamman]:** Terima kasih Tuan Yang di-Pertua, terima kasih Yang Berhormat Alor Setar. Sebelum itu, saya mohon izin untuk menjawab secara duduk Tuan Yang di-Pertua kerana kaki masih lagi bercuti. *Assalamualaikum warahmatullahi wabarakatuh* dan salam sejahtera.

Pertubuhan Pengurusan Wat Nikhodharam Alor Setar Kedah telah dibatalkan di bawah seksyen 13(1)(c)(iv), Akta Pertubuhan 1966 [Akta 335] pada 22 Mei 2016 kerana didapati melakukan kesalahan yang melibatkan pelanggaran terhadap undang-undang berdaftar pertubuhan seperti berikut:

- (i) telah melanggar fasal 7(3)(b) kerana tidak membenteng laporan Bendahari dan Penyata Kewangan yang telah diaudit bagi tahun 2015 dalam Mesyuarat Agung Tahunan pada 6 Mac 2016;
- (ii) telah melanggar fasal 7(3)(c) kerana tidak membuat pemilihan ahli-ahli Jawatankuasa dan melantik Juruaudit untuk dua tahun yang akan datang dalam Mesyuarat Agung Tahunan pada 06 Mac 2016;
- (iii) telah melanggar fasal 9(1) kerana Pengerusi tidak menjalankan kewajipannya sebagai Pengerusi dalam Mesyuarat Agung pada 27 Mac 2016;
- (iv) telah melanggar fasal 9(3) kerana Setiausaha tidak menjalankan kewajipannya sebagai Setiausaha dalam Mesyuarat Agung pada 27 Mac 2016;
- (v) telah melanggar fasal 10(4) kerana mengeluarkan perbelanjaan sebanyak RM930,000 dan RM62,000 tanpa kebenaran Mesyuarat Agung terlebih dahulu; dan
- (vi) telah melanggar fasal 17(1) kerana pembubaran gagal mendapat persetujuan

tidak kurang daripada tiga per lima daripada jumlah ahli yang menghadiri Mesyuarat Agung Khas.

Tuan Yang di-Pertua, susulan daripada itu, pada 27 Jun 2016, pertubuhan telah mengemukakan permohonan rayuan di bawah seksyen 18, Akta 335 agar pembatalan pendaftaran pertubuhan ini ditarik balik. Namun demikian, keputusan Menteri Dalam Negeri melalui surat keputusan bertarikh 21 November 2017 terhadap permohonan rayuan tersebut adalah tidak diluluskan dan pembatalan pendaftaran pertubuhan ini dikekalkan.

Dalam hal ini, permohonan rayuan oleh pihak pertubuhan tidak dipertimbangkan dengan mengambil kira bahawa kesalahan yang dilakukan adalah amat berat kerana melibatkan kegagalan mematuhi undang-undang berdaftar pertubuhan itu sendiri. Selain itu, permohonan rayuan tersebut juga dibuat melebihi 30 hari yang ditetapkan dan ini jelas menunjukkan bahawa pertubuhan tidak mematuhi seksyen 18, Akta 335.

Ahli Yang Berhormat, berhubung dengan sama ada pemindahan segala aset sebelum pertubuhan tersebut dibatalkan adalah sah dari segi undang-undang, ia tertakluk sama ada proses pemindahan aset tersebut mengikut undang-undang berdaftar pertubuhan ataupun sebaliknya. Sekiranya pemindahan aset oleh pertubuhan tidak mengikut undang-undang berdaftar pertubuhan, maka pertubuhan telah gagal mematuhi undang-undang tubuhnya sendiri dan Akta Pertubuhan 1966. Manakala, pemindahan aset pertubuhan selepas pertubuhan dibatalkan perlu dirujuk kepada Jabatan Insolvensi Malaysia untuk tindakan selanjutnya.

Berhubung dengan status siasatan ke atas laporan polis yang telah dibuat, Polis Diraja Malaysia (PDRM) telah membuka Kertas Enkuiri Polis (KEP) yang mana ia telah dirujuk sebanyak tiga kali kepada Pejabat Pendakwaan Negeri Kedah (PPN). Kali terakhir KEP dirujuk adalah pada 16 Jun 2019 untuk pandangan dan pertimbangan Pihak Pejabat Pendakwaan Negeri Kedah. Sekian dan terima kasih.

**Timbalan Yang di-Pertua [Dato' Mohd Rashid Hasnon]:** Terima kasih Yang Berhormat Timbalan Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, hari Isnin, 15 Julai 2019.

***[Kamar Khas ditangguhkan pada pukul 2.47 petang]***